

von Wulf Wager

Mixr-Eggsblosio



Mei Frau will emmr, dass i mi guad ernähr. Offasichtlich liegt ra dra, dass i xond alt werd, was jo bei de heutige Scheidongsrata au net grad selbschtvrständig isch. Dodrzua gheert jedafalls, dass i viel Obscht ond Gmias essa soll. Drbei isch doch 's oinzige Gmias, wo i mag Floisch. Aber trotzdem mix i ons emmr wieder amol a scheene Frucht Mischung aus Breschtleng, Himbeera, Heidelbeera, a bissle Joghurt ond a Schuggerle Honig.

Des schmeckt wirklich guad ond soll au xond sei ond isch drzua na no billiger, wia so kauft's Zuigs.

Dommerweis han i neulich amol, wo i so a Beeramischmasch gmacht han, vergessa, da obere Deckel richtig uf den Mixr zom macha. In de ondere Drehzahla isch des jo koi Problem. Aber wo dia Beera scho ganz guad zerstücklt warat, han i da Mixr bis an A'schlag dreht ond ben gschwend uf's Clo ganga. Scho am Geräusch han i von dr Ferne gheert, dass do ebbes net stemmt...

Wo i zrück komma be, han i des Malheur gseah! Do hot sich der Beeramix so ausdehnt, dass des rote Xöff da Deckel von dem Mixr gsprenget hot on sich en dr ganza Kiche vrtoilt hot: an de Wänd, an de Schränk, ufam Boda, en dr Essecke, oifach ibrall isch des rote, bäppige Zeug g'hangat.

Des war dr teuerschte ond o'xündeschte Mix, den i je gmacht han, schließlich hen mr miassa onser Kiche renoviera ...

Bis näggschd Woch

Ihr xond lebender

Wulf Wager